

摘藻堂四庫全書薈要

史部

欽定四庫全書蒼要卷六千四百八史部

元史卷二十九

明翰林學士亞中大夫知制誥兼修國史宋濂等修

本紀第二十九

泰定帝一

泰定皇帝諱伊蘇特穆爾顯宗噶瑪拉之長子裕宗之嫡孫也初世祖以第四子諾木罕為北安王鎮北邊北安王薨顯宗以長孫封晉王代之統領太祖四大鄂爾

多及軍馬達勒達國土至元十三年十月二十九日帝

生于晉邸大德六年晉王薨帝襲封是為嗣晉王仍鎮

北邊成宗武宗仁宗之立咸與翊戴之謀有盟書焉王

府內史都爾蘇得幸於帝常偵伺朝廷事機以其子哈

克繖事丞相拜珠且入宿衛久之哈克繖歸言御史大

夫特克實與拜珠意相忤欲傾害之至治三年三月宣

徽使塔坦來王邸為都爾蘇言主上將不容於晉王汝

盍思之於是都爾蘇塔坦深相要結八月二日晉王獵

於圖喇之地特克實密遣烏魯斯來告曰我與哈克繖額森特穆爾實達爾謀已定事成推立王為皇帝又命烏魯斯以其事告都爾蘇且言汝與巴蘇呼知之勿令舒瑪爾節得聞也於是王命囚烏魯斯遣巴勒密實特等赴上都以逆謀告未至癸亥英宗南還駐蹕南坡是夕特克實等矯殺拜珠英宗遂遇弒于幄殿諸王諳達布哈及額森特穆爾奉皇帝璽綬北迎帝于鎮所九月癸巳即皇帝位於龍居河大赦天下詔曰朕考晉獻武

王色辰皇帝之嫡孫裕宗皇帝之長子也聖慈眷愛封

授晉王統領青吉斯皇帝四大鄂爾多及軍馬達勒達

國土就國以後恪遵色辰皇帝聖旨小心謹慎凡軍馬人

民一切事宜咸由正道而行故數年之間羣臣各敬其

事百姓得安其業嗣後諤勒哲圖皇帝命朕繼承籓服

仍統領四大鄂爾多及北邊軍馬翼戴朕兄庫魯克皇

帝布延圖皇帝朕姪碩迪巴拉皇帝歷事累朝無貳爾

心以繼朕皇考固讓之志恪恭厥職屏衛王家朕行之

事諸王宗室臣民皆所素知今大行皇帝上賓迤南諸  
王大臣軍士及諸王駙馬臣僚達勒達百姓等咸謂天  
位不宜久虛乾綱固有專主近屬之中惟朕為色辰皇  
帝嫡曾孫裕宗皇帝嫡冢孫以長以親於義皆無可讓  
况大行晏駕事變非常及今加意撫綏猶恐皇皇未定  
宜早正宸極鎮安百姓使天下人心得寧朕以臣民勸  
戴之故俯順輿情九月初四日即位於青吉斯皇帝之  
大鄂爾多布告中外咸與維新可大赦天下是日以知

樞密院事淇陽王額森特穆爾為中書右丞相諸王伊

嚕特穆爾襲封安西王甲午以內史都爾蘇為中書平

章政事奈瑪台為中書右丞特克實知樞密院事巴蘇

呼同知樞密院事博羅為宣徽院使舒瑪爾節為宣政

院使乙未大理護子羅蠻為寇以樞密副使阿薩爾為

御史中丞內史舒蘇為中書左丞丁酉以諤勒哲知樞

密院事圖們同僉樞密院事戊戌以薩題勒密實知樞

密院事章台同知樞密院事己亥敕諭百司凡銓授官

遵世祖舊制惟樞密院御史臺宣政院宣徽院得自奏  
聞餘悉由中書辛丑以茂穆蘇知樞密院事實達爾為  
大司農召諸王官屬流徙遠地及還元籍者二十四人  
還京師是月大寧蒙古大千戶部風雪斃畜牧賑米十  
五萬石南康漳州二路水淮安揚州屬縣饑賑之冬十  
月癸亥修佛事於大明殿甲子遣使至大都以即位告  
天地宗廟社稷誅逆賊額森特穆爾諤勒哲索諾木圖  
們等於行在所以舒瑪爾節為中書右丞相陝西行中



書省左丞相圖嚕通政院使寧珠並為御史大夫蘇蘇

為御史中丞遣舒瑪爾節寧珠誅逆賊特克實實達爾

齊琳特穆爾托和齊章台等於大都並戮其子孫籍入

家產戊辰召伊都呼高昌王特穆爾布哈已巳太白犯

亢壬申以內史阿勒坦綽克為太師知樞密院事丙子

太白犯氐詔百司遵守世祖成憲癸未以舒瑪爾節兼

阿蘇衛達嚕噶齊丙戌以江浙行省平章政事額卜德

呼勒為中書平章政事八番順元及靜江大理威楚諸

路徭兵為寇救湖廣雲南招諭之揚州江都縣火雲南  
王西平王二部衛士饑皆賑之十一月己丑朔熒惑犯  
亢車駕次中都修佛事于昆剛殿庚寅太白犯鉤  
鈐乙未太白犯東咸丙申次於實桂辛丑車駕至大都  
壬寅熒惑犯氐諸王徹伯爾遣使來朝丁未御大明殿  
受諸王百官朝賀庚戌詔百司朝夕視事毋怠辛亥御  
史中丞董守庸坐黨特克實免官壬子救營繕不急者  
罷之癸丑遣使詣曲阜以太牢祀孔子救會福院奉北

安王諾木罕像于高良河寺祭遁甲五福神甲寅諸王  
徹伯爾遣使來朝乙卯崇星於司天監丙辰御史中丞  
蘇蘇坐貪淫免官丁巳廣州路新會縣民汜長弟作亂  
廣東副元帥烏瑪喇率兵捕之開南州大阿哀阿三木  
台龍買六千餘人寇哀卜白鹽井詔凡有罪自首者原  
其罪袁州路宜春縣鎮江路丹徒縣饑賑糶米四萬九  
千石沅州黔陽縣饑芻陂屯田旱並賑之十二月己未  
御史臺經歷多爾濟巴勒御史實勒塔克鄂都瑪勒額

森呼圖克坐黨特克實免官御史言曩者特們德爾專

政誣殺楊多爾濟蕭拜珠賀巴延觀音保索約勒哈迪

密實黥竄李謙亨成珪罷免王毅高昉張志弼天下咸

知其冤請雪之詔存者名還錄用死者贈官有差授諸

王色徹肯以其父故金印庚申以宦者噶實爾為中政

院使壬戌賜潛邸衛士錢人六十錠浚鎮江路漕河及

練湖役丁萬三千五百人給諸王巴拉實哩印戊辰請

皇考皇妣謚於南郊皇考晉王曰光聖仁孝皇帝廟號

顯宗皇妣晉王妃曰宣懿淑聖皇后己巳辰星犯壘壁  
陣庚午以即位大賚后妃諸王百官金七百餘錠銀三  
萬三千錠錢及幣帛稱是遣使祀海神天妃盜入太廟竊  
仁宗及莊懿慈聖皇后金主辛未熒惑犯房壬申作  
仁宗主仍督有司捕盜禁星于司天監癸酉德慶路瀧  
水縣徭劉寅等降甲戌命道士吳全節修醮事乙亥征  
東夷民奉獸皮來附太常院臣言世祖以來太廟歲惟  
一享先帝始復古制一歲四祭請裁擇之帝曰祭祀大

事也朕何敢簡其禮命仍四祭監察御史托克托趙成慶等言特們德爾在先朝包藏禍心離間親藩誅戮大臣使先帝孤立卒罹大禍其子索諾木親與逆謀久違天憲乞正其罪以快人心伊嚕托克托哈蘇台皆特克實黨不宜寬宥遂並伏誅丙子命嶺北守邊諸王齊齋克圖修佛事以却寇兵己卯命僧作佛事於大內以厭雷增諸王色徹肯駙馬赫伯等歲賜金銀幣帛辛巳癸惑犯東咸壬午諸王諤斯伯遣齊喇來朝賜以金幣癸

未廣西右江來安路總管岑世興遣其弟世元入貢流  
諸王伊嚕特穆爾於雲南諳達布哈于海南庫魯克布  
哈于尼魯罕博囉烏魯斯布哈于海島並坐與特克實  
等逆謀乙酉雲南車里于孟為寇詔招諭之諭百司惜  
名器遵世祖定制丙戌舒瑪爾節言近額森特穆爾之  
變諸王邁努逃赴潛邸願効死力且言不除元兇則陛  
下美名不著天下後世何從而知上契聖衷嘗蒙獎諭  
今臣等議宗戚中能自拔逆黨盡忠朝廷者惟有邁努

請加封賞以示激勸遂以秦寧縣五千戶封邁努為秦寧王知樞密院事大司徒庫春貝授開府儀同三司以前太師巴古商議軍國重事丁亥議賞討逆功賜舒瑪爾節金十錠銀三十錠鈔七十錠都爾蘇為中書左丞相知樞密院事茂穆蘇御史大夫寧珠宣政院使索多並加授光祿大夫仍賜金銀鈔有差塑瑪哈噶拉佛像於延春閣之徽清亭下詔改元詔曰朕荷天鴻禧嗣大歷服側躬圖治夙夜祇畏惟祖訓是遵乃開歲甲子景



運伊始思與天下更新稽諸典禮踰年改元可以明年  
為泰定元年免大都興和差稅三年八番思播兩廣洞  
塞差稅一年江淮勑科包銀三年四川雲南甘肅秋糧  
三分河南陝西遼陽絲鈔三分除虛增田稅免鄂拓克  
逋錢賑恤雲南廣海八番等處戍軍求直言賜高年帛  
禁獻山場湖泊之利定吏員出身者秩正四品以追尊  
皇考皇妣詔天下雲南花脚蠻為寇詔招諭之平江嘉  
定州饑遼陽岱音愛滿庫庫部風雹賑之澧州歸州饑

賑糶米二萬石是歲夏諸衛屯田及大都河間保定濟南濟寧五路屬縣霖雨傷稼秋忻州定襄縣及忠翊侍衛屯田所營田象食屯田所隕霜殺禾土番岷州春疫夏旱西番寇鞏昌府

泰定元年春正月乙未以奈瑪台為平章政事舒蘇為右丞敕諸王哈喇還本部召江西行省平章政事額爾吉訥赴闕己亥以誅逆臣額森特穆爾等詔天下辛丑諸王大臣請立皇太子賜諸王齊齊克圖金一錠銀六

十錠幣帛各百匹塔斯布哈金一錠銀四十錠幣帛二

百匹阿古特穆爾等金銀有差壬寅以故丞相拜珠子

達爾瑪實哩為宗仁衛親軍都指揮使齊哩克為左右

阿蘇衛親軍都指揮使命僧諷西番經于光天殿甲辰

敕譯列聖制詔大元通制刊本賜百官丁未以青海屯

田萬戶府達嚕噶齊德沁假嶺北行中書省參知政事

近侍呼圖克特穆爾假禮部尚書使西域諸王保賽音

部戊申八番生蠻韋光正等及楊黃五種人以其戶二

萬七千來附請歲諭布二千五百疋置長官司以撫之  
己酉命諸王遠徙者悉還其部召親王圖卜特穆爾于  
瓊州阿穆爾克于大同定集賽台歲給鈔人八十錠甲  
寅賜諸王太平呼喇台巴克實特穆爾等金印敕高麗  
王還國仍歸其印糶米二十萬石賑京師貧民丙辰賜  
故監察御史觀音保索約勒哈迪密實妻子鈔各千錠  
賜司徒敦珠克印敕封解州鹽池神曰靈富公廣德信  
州惠州岳州南恩州饑賑之二月丁巳朔作顯宗影堂

已未修西番佛事于壽安山寺曰桑節噶拉曰科爾羅  
普爾普曰楚多爾瑪曰薩戩布勒納木扎勒經僧四十  
人三年乃罷庚申監察御史傅巖起李嘉賓言遼王托  
克托誅屠骨肉其惡已彰恐懷疑貳如今歸藩譬之縱  
虎出柙請廢之別立近族以襲其位不報甲子作佛事  
命僧百八人及倡優百戲導帝師游京城庚午選守令  
推官舊制臺憲歲舉守令推官二人有罪連坐至是言  
其不便復命中書于常選擇人用之壬申請上大行皇

帝諡于南郊曰睿聖文孝皇帝廟號英宗甲戌江浙行  
省左丞趙簡請開經筵及擇師傅令太子及諸王大臣  
子孫受學遂命平章政事張珪翰林學士承旨和塔拉  
都哩默色學士吳澄集賢直學士鄧文原以帝範資治  
通鑑大學衍義貞觀政要等書進講復敕右丞相額森  
特穆爾領之諸王徹伯爾博囉遣使來貢高昌王伊都  
呼特穆爾布哈遣使進蒲萄酒丁丑監察御史宋本趙  
成慶李嘉賓言盜竊太廟神主由太常守衛不謹請罪

之不報戊寅御史李嘉賓劾逆黨左阿蘇衛指揮使圖  
卜特穆爾罷之癸未諭伊嚕勒昆各如教具戒加封廣  
德路祠山神張真君曰普濟寧國路廣惠王曰福祐紹  
興元慶延安岳州潮州五路及鎮遠府河州集州饑發  
粟賑之三月丁丑朔罷徽政院立詹事院以大傅托迪  
宣徽使圖們岱爾桓國公實德哩太尉超爾達爾罕並  
為太子詹事中書參知政事王居仁為太子副詹事以  
同知宣政院事楊廷玉為中書參知政事罷大同路黃

華嶺及崇慶屯田賜壽寧公主金十錠銀五十錠鈔二萬錠乙未以江西行省平章政事額爾吉訥知樞密院事置定王色徹肯總管府給蒙古流民糧鈔遣還所部敕擅徙者斬匿藏者杖之賜諸王齊齊克圖永福縣戶萬三千六百為食邑仍置王傅戊戌廷試進士賜巴拉張益等八十四人及第出身有差會試下第者賜教官有差中書省臣禁橫奏賞賚及請踰越奏事者從之庚子奇徹罷為陝西行臺御史大夫以四川行省中書平



章政事囊嘉岱兼宣政院使往鎮西番寇贊布凌癸卯

命中書平章政事奈瑪台攝祭南郊知樞密院使庫春

貝攝祭太廟以冊皇后皇太子告丙午御大明殿冊巴

拜哈斯氏為皇后皇子喇實晉巴為皇太子己酉以皇

子巴特瑪雅爾藏布嗣封晉王泰寧王邁努卒以其子

琳沁多爾濟嗣遣湘寧王巴拉實哩鎮察汗諾爾罷宣

慰司立王傳府以知樞密院事額爾吉訥為雲南行省

右丞相召流人還京師庚戌伊特戡民珠扎干達爾罕

來獻大珠監察御史宋本李嘉賓傳巖起言太尉司徒

司空三公之職濫假僧人及會福殊祥二院並辱名爵

請罷之不報癸丑諸王保賽音遣使朝貢臨洮狄道縣

冀寧石州離石寧縣鄉旱饑賑米兩月廣西橫州猺寇

永淳縣夏四月戊午廉恂罷為集賢大學士食其祿終

身賜乳母李氏鈔千定賜征贊布凌軍千人鈔四萬七

千錠太尉布哈平章政事濟蘭坐矯制以寡婦噶哈強

配薩題被鞠詔以世祖舊臣原其罪己未以珠字詔賜

帝師所居薩斯嘉部庚申詔整飭御史臺作昭聖皇后御容殿於普慶寺辛酉命昌王巴拉實哩鎮阿南達昔所居地親王圖卜特穆爾至自潭州及旺沁皆賜車帳駝馬癸亥以國言上英宗廟號曰格根皇帝修佛事於壽昌殿甲子車駕幸上都以諸王庫春布哈實喇平章政事額卜德噶勒右丞舒蘇等居守以嶺北行中書省左丞普爾普為中書左丞江南行臺中丞托多為中書參知政事瑪喇勒罷為太史院使罷衛士四百人還宗

仁衛賜北庭塔齊爾鄂拉軍羊馬諸王保賽音來貢發  
兵民築渾河堤丙寅賜昌王巴拉實哩牛馬索駝稅僧  
道邸舍積貨丁卯遣諸王訥古伯等還和琳封巴拉實  
哩繼母滿達勒為皇妹昌國大長公主給銀印以和斯  
瑪昂為哈資和卓主西域戶籍辛未月食既癸酉以太  
子詹事圖們岱爾為中書平章政事甲戌命呪師作佛  
事厭雷庚辰以風烈月食地震戒飭百官辛巳太廟新  
殿成摩琳色埒默部及北邊蒙古戶饑賑糧鈔有差江

陵路屬縣饑雲南中慶昆明屯田水五月丁亥監察御

史董鵬南劉潛邊笥慕旺舒卜以灾異上言平章奈曼

台宣徽院使特穆爾布哈詹事圖們岱爾黨附逆徒身

虧臣節太常守廟不謹遼王擅殺宗親布哈濟蘭矯制

亂法皆蒙寬宥甚為失刑乞定其罪以銷天變不允已

丑帝諭都爾蘇曰朕即位以來無一人能執成法為朕

言者知而不言則不忠且陷入於罪繼自今凡有所知

宜悉以聞使朕明知法度斷不敢自縱非獨朕身天下

一切正務能守法以行則衆皆又安反是則天下罹於  
憂苦又曰凡事防之於小則易救之於大則難爾其以  
朕言明告於衆俾知所慎壬辰御史臺臣圖古勒寧珠  
以御史言災異屢見宰相宜避位以應天變可否仰自  
聖裁顧惟臣等為陛下耳目有徇私違法者不能糾察  
慢官失守宜先退避以授賢能帝曰御史所言其失在  
朕卿等何必遽爾圖古勒又言臣已老病恐誤大事乞  
先退於是中書省臣額卜德呼勒張珪楊廷玉抗疏乞

罷丞相舒瑪爾節都爾蘇言比者災異陛下以憂天下  
為心反躬自責遵祖宗聖訓修德慎行救臣等各勤乃  
職手詔至大都居守省臣皆引罪自劾臣等為左右相  
才下識昏當國大臣無所裒贊以致災祲罪在臣等所  
當退黜諸臣何罪帝曰卿若皆辭避而去國家大事朕  
孰與圖之宜各相諭以勉乃職戊戌遷列聖神主于太  
廟新殿辛丑循州徭寇長樂縣甲辰赦上都囚答罪以  
下者丙午太白犯鬼侍御史高奎上書請求直言辨邪

正明賞罰帝善其言賜以銀幣丁未太白犯鬼積尸氣  
已酉賓州民方二等為寇有司捕擒之癸丑命司天監  
崇星中書平章政事圖們岱爾領宣徽使詹事丞和和  
請如裕宗故事擇名儒輔太子敕中書省臣訪求以聞  
袁州火龍慶延安吉安杭州大都諸路屬縣水民饑賑  
之六月乙卯朔遣諸王庫庫楚鎮輝和爾賜金銀鈔千  
計戊午雲南蒙化州高蘭神場寨主照明羅九等寇威  
楚庚申張珪自大都至以守臣集議事言逆黨未討奸



惡未除忠憤未雪冤枉未理政令不信賞罰不公賦役不均財用不節請裁擇之不允諸王阿穆爾克薨賻鈔千錠諸王庫春伊勒吉齊來朝賜駙馬特穆爾等部鈔一萬三千錠北邊戍兵鈔萬六千八十錠賑蒙古饑民遣還所部延安路饑禁酒癸亥作禮拜寺於上都及大同路給鈔四萬錠丙寅遣使招諭贊卜凌遣庫庫楚等詣高麗取女子三十人廣西左右兩江黃勝許岑世興乞遣其子弟朝貢許之丁卯大幄殿成作辰類坐靜佛

寺庚午置哈喇圖屯田總管府辛未修黑雅滿達噶佛  
事於水晶殿癸酉帝受佛戒於帝師己卯諸王徹伯爾  
等遣其宗親特穆爾布哈奉馴豹西馬來朝貢詔疏決  
繫囚存恤軍民免天下和買雜役三年蠶戶差稅一年  
百官四品以下普覃散官一等三品遞進一階遠仕瘴  
地身故不得歸葬妻子流落者有司資給遣還仍著為  
令雲南大理路你囊為寇大都真定晉州深州奉元諸  
路及甘肅河渠營田等處雨傷稼賑糧二月大司農屯

田諸衛屯田彰德汴梁等路兩傷稼順德大名河間東  
平等二十一郡蝗晉寧鞏昌常德龍興等處饑皆發粟  
賑之大同渾源河真定滹沱河陝西渭水黑水渠州江  
水皆溢並漂民廬舍宣德府鞏昌路及八番金石番等  
處雨雹河間晉寧涇州揚州壽春等路湖廣河南諸屯  
田旱秋七月丙戌思州平茶楊大車酉陽州冉世昌寇  
小石耶凱江等寨調兵捕之諸王阿穆爾薨賻鈔五千  
錠賜雲南王王禪鈔二千錠諸王阿都齊鈔三千錠作

楠木殿招諭船領義寧靈川等處徭庚寅遣使代祀岳  
瀆丙申以諸王色徹圖襲統其父諤勒哲所部給故印  
已亥賑蒙古流民給鈔二十九萬錠遣還禁擅離所部  
違者斬庚子諸王巴延特穆爾出鎮庫稜東部喇特納  
實哩出鎮沙州各賜鈔三千錠薩題勒密實率衛士佐  
太師阿勒坦綽克行邊賜鈔千錠癸卯罷廣州福建等  
處採珠蛋戶為民仍免差稅一年丙午以輝和爾字譯  
西番經丁未崇星于上都司天監以山東鹽運司判官

瑪哈特穆為吏部尚書佩虎符翰林修撰楊宗瑞為禮部郎中佩金符奉即位詔往諭安南置長慶寺以宦者鄂勒博為寺卿罷中瑞司中書省臣言東宮衛士先朝止三千人今增萬七千請命詹事院汰去仍依舊制從之戊申以籍入特們德爾及子巴勒丹觀音努賫產給還其家奉元路朝邑縣曹州楚邱縣大名路開州濮陽縣河溢大都路固安州清河溢順德路任縣沙澧洺水溢真定廣平廬州等十一郡雨傷稼龍慶州雨雹大如

雞子平地深三尺定州屯河溢山崩免河渠營田租大  
都鞏昌延安冀寧龍興等處饑賑糶有差廣西慶遠徭  
酋潘父絹等率衆來降署為簿尉等官有差加封溫州  
故平陽侯曰英烈侯八月甲寅察察爾和爾果斯之地  
五千貧乏賑糧二月乙卯赦以刑獄復隸宗正府依世  
祖舊制刑部勿與丙辰享太廟丁巳賜諸王巴爾台和  
托鈔各千五百錠禁言赦前事庚申市牝馬萬匹取漣  
酒賑特爾根穆稜等驛戶糧鈔有差辛亥遣翰林學士

承旨鄂齊爾祀太祖太宗睿宗御容于普慶寺賜親王  
圖卜特穆爾鈔三千錠庚午作中宮金眷殿辛未繪帝  
師帕克斯巴像頒各行省俾塑祀之敕武官坐罪制授  
者以聞勅授者從行省處決以金泉館酒課賜壽寧公  
主丁丑罷浚玉泉山河役車駕至大都癸未敕樞密役  
軍凡三百人以上奏聞招諭雲南大車里小車里秦州  
成紀縣大雨山崩水溢壅土至來谷河成邱阜汴梁濟  
南屬縣雨水傷稼賑之延安冀寧杭州潭州等十二郡

及諸王赫伯等部饑賑糧有差九月乙酉封伊蘓伯奇  
為荆王賜金印以宣德府復隸上都留守司辛卯罷哈  
斯德濟魯斯本布總統所更置臨洮總管府賜潛邸衛  
士鈔萬錠丙申葺太祖神御殿乙巳昭獻元聖皇后忌  
日修佛事飯僧萬人敕存恤武衛軍一年癸丑以籍入  
阿薩爾家貲給其子圖烈改邕州為南寧路岑世興遣  
其弟興元來朝貢奉元路長安縣大雨澧水溢延安路  
洛水溢濮州館陶縣及諸衛屯田水建昌紹興二路饑



賑糧有差冬十月乙卯秦州成紀縣趙氏婦一產三男  
成都嘉穀生一莖九穗丁巳監察御史王士元請早諭  
教太子帝嘉納之戊午享太廟立壽福總管府秩正三  
品典累朝神御殿祭祀及錢穀事降大天源延聖寺總  
管府為提點所以隸之庚申命左右相日直禁中有事  
則赴中書丙寅太白犯斗己巳太白入斗太陰犯填星  
雲南車里蠻為寇遣鄂爾多奉詔招諭之其酋塞賽子  
尼而鴈搆木子刁零出降庚午太白犯斗壬申安南國

世子陳日曠遣其臣莫節夫等來朝貢真州珠金沙河  
松江府吳江州諸河淤塞詔所在有司備民丁浚之丙  
子命帝師作佛事於延春閣丁丑緬國王子吾者那等  
爭立歲貢不入命雲南行省諭之徙封雲南王旺沁為  
梁王食邑益陽州六萬五千戶仍以其子特穆爾襲封  
雲南王封親王圖卜特穆爾為懷王食邑端州六萬五  
千戶增歲賜幣帛千匹賜金印壬午熒惑犯壘壁陣肇  
慶徃黃寶才等降延安路饑發粟賑之給鈔四千錠廣

東道及武昌路江夏縣饑賑糶有差河南廉訪使邁努  
坐多徵公田租免官以魯國大長公主女適懷王十一  
月己丑命道士修醮事癸巳遣兵部員外郎宋本吏部  
員外郎鄭立鄂爾和工部主事張成太史院都事費著  
分調閩海兩廣四川雲南選諸王保賽音言其臣綽班  
有功請官之以綽班為開府儀同三司翊國公給銀印  
金符賜諸王沙卜珠丹伊蘓蘓爾鈔各千五百錠烏爾  
圖罕鈔千二百錠羅本鈔千五百錠甲午崇星于回回

司天監己亥以準台知樞密院事辛丑造金寶蓋飾以  
七寶貯佛舍利甲辰作歇山盃頂樓于上都丁未釋答  
四十七以下囚及輕罪流人給鈔二千錠散與貧者印  
明年鈔本至元鈔四十萬錠中統鈔十萬錠己酉免伊  
嚕勒昆達實密差役庚戌招諭融州徭般領大小木龍  
等百七十五團河間路饑賑糧二月汴梁信州泉州南  
安贛州等路饑賑糶有差嘉定路龍興縣饑賑糧一月  
大都上都興和等路十三驛饑賑鈔八千五百錠十二

月癸丑朔以岑世興為懷遠大將軍遙授沿邊溪洞軍  
民安撫使佩虎符仍來安路總管黃勝許為懷遠大將  
軍遙授沿邊溪洞軍民安撫使佩虎符致仕其子志熟  
襲為上思州知州降詔宣諭仍各賜幣帛二乙卯雲南  
猛阿吾及歪鬧為寇行省督兵捕之庚申同州地震有  
聲如雷癸亥鹽官州海水溢屢壞隄障侵城郭遣使祀  
海神仍與有司視形勢所便還請疊石為塘詔曰築塘  
是重勞吾民也其增石因扞禦庶天其相之乙丑給蒙

古子女孳畜丙寅命翰林國史院修纂英宗顯宗實錄  
敕內外百官凡行朝賀等禮雨雪免朝服庚午熒惑犯  
外屏辛未作棕殿成諸王蘓蘓勒台薨賻鈔五百錠乙  
亥太白經天曲赦重囚三十八人以為三宮祈福夔路  
容米洞蠻田先什用等九洞為寇四州行省遣使諭降  
五洞餘發兵捕之陝西行省以兵討階州土蕃察汗諾  
爾千戶部饑賑糧一月延安路雹災賑糧一月溫州路  
樂清縣鹽場水民饑發義倉粟賑之兩浙及江東諸郡

水旱壞田六萬四千三百餘頃

二年春正月丙戌辰星犯天雞乙未以畿甸不登罷春  
畋禁后妃諸王駙馬毋通星術之士非司天官不得妄  
言禍福敕御史臺選舉與中書合議以聞中書省臣言  
江南民貧僧富諸寺觀田土非宋舊置并累朝所賜者  
請仍舊制與民均役從之以籍入薩斯嘉地賜故監察  
御史觀音保索約勒哈迪密實妻子各十頃戊戌造象  
輦贊布凌來降賜其酋班珠爾銀鈔幣帛辛丑懷王圖

卜特穆爾出居建康壬寅太白犯建星甲辰奉安顯宗  
像于永福寺給祭田百頃廣西山獠為寇命所在有司  
捕之江浙行省平章政事托歡達爾罕陞為左丞相諸  
王徹伯爾遣使貢方物賜鈔四萬錠戊申以策喇實班  
巴爾藏布為土蕃等路宣慰使都元帥兼管長河西本  
布喇實剛楚實勒嘉勒朶甘斯圖沙瑪等管軍達魯噶  
齊與其屬往鎮撫贄布凌庚戌諭宰臣曰向者珠爾罕  
楚古爾蘇及山後皆地震內郡大小民饑朕自即位以



來惟太祖開創之艱世祖混一之盛期與人民共享安樂常懷祇懼災沴之至莫測其由豈朕思慮有所不及而事或僭差天故以此示儆卿等其與諸司集議便民之事其思自死罪始議定以聞朕將肆赦以詔天下肇慶鞏昌延安贛州南安英德新州梅州等處饑賑糶有差閏月壬子朔詔赦天下除江淮糶科包銀免被災地差稅一年庚申修野狐嶺色珍桑乾嶺道乙丑命整治屯田河南行省左丞姚煒請禁屯田吏蠶食屯戶及勿

務羨增以廢裕民之意不報丁卯中書省臣言國用不足請罷不急之費從之置惠遠倉永需庫於哈喇圖總管府已已修滹沱河堰壬申罷永興銀場聽民採鍊以十分之二輸官罷松江都水庸田使司命州縣正官領之仍加兼知渠堰事癸酉作棕毛殿丙子浙西道廉訪司言四方代祀之使棄公營私多不誠潔故神不歆格請慎擇之山南廉訪使特穆格請削降特克實所用驟陞官戊寅諸王呼圖克坦默色等來朝賜金銀鈔帛有差

己卯河間真定保定瑞州四路饑禁釀酒階州土蕃為  
寇鞏昌總帥府調兵禦之扎木巴勒嘉勒燦叛於鄂端  
保定路饑賑鈔四萬錠糧萬五千石雄州歸信諸縣大  
雨河溢被災者萬一千六百五十戶賑鈔三萬錠南賓  
州棣州等處水民饑賑糧二萬石死者給鈔以葬五花  
城蘓默圖珠扎干茂三驛饑賑糧二千石衡州衡陽縣  
民饑瑞州蒙山銀場丁饑賑之山東廉訪使許師敬請  
頒族墓制禁用陰陽相地邪說二月甲申祭先農丙戌

頌道經於天下名山宮觀丁亥平伐苗酋的娘率其戶  
十萬來降土官三百六十人請朝湖廣行省請汰其衆  
還部令的娘等四十六人入覲從之己丑加嗣漢三十  
九代天師張嗣成太玄輔化體仁應道大真人庚寅熒  
惑辰星填星聚于畢辛卯賑安定王多爾濟巴勒部軍  
糧三月瓜哇國遣其臣昔刺僧迦里也奉表及方物來  
朝貢廣西徭潘寶陷柳城縣丁酉禛星于回回司天監  
己亥命西僧作燒壇佛事於延華閣封阿爾默色為和

國公張珪為蔡國公仍知經筵事以中書右丞舒蘓為

平章政事參知政事普爾普為右丞御史大夫圖古勒

加太保仍御史大夫庚子姚煒以河水屢決請立行都

水監於汴梁倣古法備捍仍命瀕河州縣正官皆兼知

河防事從之丙午造玉御牀戊申命道士祭五福太一

神庚戌通漕二州饑賑之薊州寶坻縣慶元路象山諸

縣饑賑糧二月甘州蒙古驛戶饑賑糧三月大都鳳翔

寶慶衡州潭州全州諸路饑賑糴有差三月癸丑修曹

州濟陰縣河隄役民丁一萬八千五百人甲寅禁捕天  
鵝丁巳賜諸王特穆爾布哈等鈔有差辛酉咸平府清  
河寇河合流失故道壞堤堰救蒙古軍千人及民丁修  
之乙丑車駕幸上都諸王吹巴勒部戰士四百人征贊  
布凌有功人賞鈔四千錠乙亥安南國世子陳日煥遣  
使貢方物荆門州旱瀆州薊州鳳州延安歸德等處民  
及山東蒙古軍饑賑糧鈔有差肇慶富州惠州袁州江  
州諸路及南恩州梅州饑賑糶有差夏四月丁亥作吾

殿癸巳和市牝馬有駒者萬匹敕宿衛馳馬散牧民間者歸官廩飼之丁酉濮州鄆城縣言城西堯冢上有佛寺請徙之不報辛丑加壽寧公主為皇姊大長公主禁山東諸路酒丙午熨夷及蒐雁遮殺雲南行省所遣諭蠻使者敕追捕之丁未封后父浩里烏齊爾為威靖王戊申以許師敬為中書左丞中政使馮亨為中書參知政事仍中政使奉元路白水縣電鞏昌路伏羌縣大雨山崩鎮江寧國瑞州桂州南安寧海南豐潭州涿州等

處饑賑糶五萬餘石隴西漢中秦州饑賑鈔三萬錠五  
月壬子車里陶刺孟及大阿哀蠻兵萬人乘象寇陷朶  
刺等十四寨木邦路蠻八廟率焚夷萬人寇陷倒八漢  
寨督邊將嚴備之癸丑龍牙門蠻遣使貢方物辛未罷  
京師官鬻鹽肆十五改河間鹽運司為大都河間等路  
都轉運鹽使司遣察納使于周王和實拉癸酉融州否  
泉洞吉龍洞洞村山黑江諸徭為寇廣西元帥府發兵  
討之丙子舒瑪爾節等以國用不足請減廢馬汰衛士



及節諸王濫賜從之賜潛邸齊哩克昆千人鈔三萬錠  
浙西諸郡霖雨江湖水溢命江浙行省及都水庸田司  
興役疏洩之置諫議書院於昌平縣祀唐劉蕡大都路  
檀州大水平地深丈有五尺汴梁路十五縣河溢江陵  
路江溢洮州臨洮府雨雹潭州興國屬縣旱彰德路蝗  
龍興平江等十二郡饑賑糶米三十二萬五千餘石葦  
昌路臨洮府饑賑鈔五萬五千錠六月己卯朔皇子生  
命巫祓除于宮葺萬歲山殿靜江徭為寇遣廣西宣慰

司捕之辛巳柳州徭為寇戍兵討斬之癸未潯州平南  
縣徭為寇達嚕噶齊都爾嘉都監姚泰亨死之甲申改  
封嘉王鴻和特穆爾為并王丙戌填星犯井鉞星丙申  
中書參知政事左塔卜台言大臣兼領軍務前古所無  
特克實以御史大夫額森特穆爾以知樞密院事皆領  
衛兵如虎而翼故成逆謀今軍衛之職乞勿以大臣領  
之庶勲舊之家得以保全從之仍賜幣帛以旌其直丁  
酉靜江義寧縣及慶遠安撫司蠻徭為寇敕守將捕之

息州民趙丑廝郭菩薩妖言彌勒佛當有天下有司以聞命宗正府刑部樞密院御史臺及河南行省官雜鞠之辛丑柳州馬平縣徭為寇湖廣行省督所屬追捕之丙午填星犯井丁未立都水庸田使司浚吳松二江敕營造毋役五衛軍士止以武衛虎賁二衛給之開南府阿只弄哀培蠻兵為寇命雲南行省督所屬兵捕之通州三河縣大雨水丈餘潼川府綿江中江水溢入城郭冀寧路汾河溢秦州秦安山移新州路旱濟南河間東

昌等九郡蝗奉元衛輝路及永平屯田豐贍昌國濟民  
等暑雨傷稼蠲其租濟寧興元寧夏南康歸州等十二  
郡饑賑糶米七萬餘石鎮西武靖王部及遼陽碩達勒  
達路饑賑糧一月秋七月戊申朔大小車里蠻來獻馴  
象已酉賜諸王揚丹等金鈔有差庚戌遣阿爾薩巴祀  
宅神于北部行幄甲寅遣使分諭猺蠻鎮康路土官你  
囊謀粘路土官賽邱羅出降木邦路土官八廟既降復  
叛崇星於上都司天監寧珠許師敬編類帝訓成請於

經筵進講仍俾皇太子觀覽有旨譯其書以進丙辰享

太廟播州蠻黎平愛等集羣夷為寇湖廣行省請兵討

之不許詔播州宣撫使楊伊埒布哈招諭之戊午遣使

祀龍虎武當二山己未置車里軍民總管府以土人寒

賽為總管佩金虎符中書省臣言往歲征徭廉訪司劾

其濫殺今凡出師請廉訪司官一員蒞軍糾正從之庚

申以宮人二賜藩王徹伯爾癸亥修大乾元寺以許師

敬及郎中瑪魯兼經筵官廣西諸徭寇城邑遣湖廣行

省左丞克楚兵部尚書李大成中書舍人瑪魯將兵二萬二千人討之仍以諸王烏爾圖罕監其軍海北狁酋盤吉祥寇陽春縣命江西行省督兵捕之庚午以國用不足罷書金字藏經威楚大理諸蠻為寇雲南行省請出師不允遣伊拉瑪丹等使大理布延實喇等使威楚招諭之恩州洞蠻楊銀千等來獻方物封駙馬博囉特穆爾知樞密院事和碩並為郡王辛未立河南行都水監申禁漢人藏執兵仗有軍籍者出征則給之還復歸

于官壬申御史臺臣言庶訪司莅軍非世祖舊制賈胡  
鬻寶西僧修佛事所費不支於國無益並宜除罷從之  
敕太傅托迪太保圖古勒日至禁中集議國事徭蠶潘  
寶寇鐔津義寧來賓諸縣命廣西守將捕之慶遠溪洞  
民饑發米二萬五百石平價糶之敕山東州縣收養流  
民遺棄子女延安鄜州綏德鞏昌等處雨雹般陽新城  
縣蝗宗仁衛屯田隕霜殺禾睢州河決順德汴梁德安  
汝寧諸路旱免其租梅州饒州鎮江邠州諸路饑賑糶

米三萬餘石八月戊子修上都香殿辛卯雲南白夷寇雲龍州癸巳歲星犯天罇辛丑遣使祀岳瀆名山大川敕諸王私入京者勿供其所用諸部曲宿衛私入京者罪之命度支監汰阿都齊所掌駝馬於外郡飼之大都路檀州鞏昌府靜寧縣延安路安塞縣雨雹衛輝路汲縣河溢南恩州瓊州饑賑糧一月臨江路歸德府饑賑糧二月衡州建昌岳州饑賑糶米一萬三千石九月戊申朔分天下為十八道遣使宣撫詔曰朕祇承洪業夙



夜惟寅凡所以圖治者悉遵祖宗成憲曩屢詔中外百司  
宣布德澤蠲賦詳刑賑恤貧民思與黎元共享有生之  
樂尚慮有司未體朕意庶政或闕惠澤未洽承宣者失  
於撫綏司憲者怠於糾察吾民重困朕甚憫焉今遣奉  
使宣撫分行諸道按問官吏不法詢民疾苦審理冤滯  
凡可以興利除害從宜舉行有罪者四品以上停職申  
請五品以下就便處決其有政績尤異暨晦跡邱園才  
堪輔治者具以名聞以湖廣行省參知政事瑪哈穆特

河東宣慰使李處恭之兩浙江東道江東道廉訪使圖  
烈圖太史院使齊履謙之江西福建道都功德使奇哩  
巴荆湖宣慰使蒙弼之江南湖廣道禮部尚書李嘉努  
工部尚書朱蒼之河南江北道同知樞密院事昂吉爾  
御史中丞曹立之燕南山東道太子詹事拜特穆爾宣  
徽院判韓讓之河東陝西道吏部尚書納克楚董訥之  
山北遼東道陝西鹽運使仲嘉努中書斷事官韓庭茂  
之雲南省湖南宣慰使哈沙冀寧路總管劉文之甘肅

省山東宣慰使圖薩特穆爾陝西行省左丞廉惇之四  
川省翰林侍講學士特穆爾布哈祕書卿吳秉道之京  
畿道以郡縣饑詔運粟十五萬石貯瀕河諸倉以備賑  
救仍敕有司治義倉禁大都順德衛輝等十郡釀酒募  
富民入粟拜官二千石從七品千石正八品五百石從  
八品三百石正九品不願仕者旌其門諸王沃濟遣使  
貢金浮圖已酉海運江南糧百七十萬石至京師庚戌  
復尚乘寺光祿寺為正三品給銀印癸丑車駕至大都

遣使祀海神天妃甲寅禁饑民結扁擔社傷人者杖一  
百著為令乙卯享太廟己未岑世興上言自明不反請  
置蒙古漢人監貳官詔優從之壬戌諸王伊濟貢馬丁  
丑浚河間陳玉帶河廣西徭寇賓州禮部員外郎元永  
貞言特克實弒逆皆由特們德爾始禍請明其罪仍錄  
付史館以為人臣戒漢中道文州霖雨山崩檀州雨雹  
開元路三河溢瓊州南安德慶諸路饑賑糧鈔有差冬  
十月戊寅朔張珪歸保定上冢以病辭祿不允岑世興

及子特穆爾率衆寇上林等州命撫諭之壬午禁成都  
路釀酒癸未以都爾蘇為御史大夫丁亥享大廟己丑  
賜恩平王塔斯布哈部鈔五千錠壬辰熒惑犯氐癸巳  
填星退犯井播州凱黎苗率諸寨苗獠為寇乙未皇后  
琳沁巴勒受佛戒於帝師丁酉廣西獠酋何童降請防  
邊自効從之乙巳寧遠知州添插言安南國土官押那  
攻掠其木末諸寨請治之敕安南世子諭押那歸其俘  
丙午寧夏路曹州屬縣水霸州衢州路饑賑之十一月

戊申周王和實拉遣使以豹獻改長寧軍為州庚戌舒  
瑪爾節以歲饑請罷皇后上都營繕從之寧珠以病乞  
罷不允丙辰郭菩薩等伏誅杖流其黨丁巳幸大承華  
普慶寺祀昭獻元聖皇后于影堂賜僧鈔千錠岑世興  
結八番蠻班光金等合兵攻石頭等寨敕調兵禦之八  
番宣慰司官失備坐罪戊午填星退犯井宿鉞星己未  
詔整飭臺綱庚申倭舶來互市廣西道宣慰使獲猺酋  
潘寶下獄其弟潘見遂寇柳州命湖廣行省左丞奇

珠捕之壬戌敕軍民官蔭襲者由本貫圖宗支申請銓

授丙寅都爾蘇復為中書左丞相加開府儀同三司錄

軍國重事丁卯罷蒙山銀冶提舉司命瑞州路領之壬

申賜諸王保寨音鈔二萬錠帛百疋諸王烏爾圖罕遣

使以追捕廣西徭寇上聞帝曰朕自即位累詔天下憫

恤黎元惟廣徭屢叛殺掠良民故命烏爾圖罕等討之

今聞迎降者甚衆宜更以恩撫之若果不悛嚴兵追捕

京師饑賑糶米四十萬石內郡饑賑鈔十萬錠米五萬

石河間諸郡流民就食通漕二州命有司存恤之杭州  
路火賑貧民糧一月常德路水民饑賑糧萬一千六百  
石十二月戊寅以達實特穆爾為中書右丞相癸未加  
達實特穆爾開府儀同三司上柱國錄軍國重事監修  
國史封薊國公諸王保寨音貢珠賜鈔二萬錠乙酉帝  
復受佛戒于帝師熒惑犯天江辰星犯建星丁亥修盪  
頂殿鎮南王圖卜布哈薨遣中書平章政事忒瑪岱攝  
鎮其地中書省臣言山東陝西湖廣地接戎夷請議選



宗室往鎮從之申禁圖讖私藏不獻者罪之癸巳京師

多盜達實特穆爾請處決重囚增調邏卒仍立捕盜賞

格從之甲午太白犯壘壁陣召張珪于保定丁酉加寧

珠知樞密院事與茂穆蘇並開府儀同三司弛瑞州路

酒禁左丞奇珠諸王烏爾圖罕征徭賊敗之元江路土

官普山為寇命戍兵捕之壬寅大寧路鳳翔府饑禁釀

酒右丞趙簡請行區田法於內地以宋董煟所編救荒

活民書頒州縣濟南延川二路饑賑鈔三千五百錠惠

州杭州等處饑賑糶有差是歲陝西府雨雹御河水溢  
以故翰林學士布哈中政使布延圖指揮使布延呼喇  
勒為特克實等所繫死贈功臣號及階勲爵謚

元史卷二十九

元史卷二十九考證

至治三年九月癸巳 按原刻無九月二字據詔書癸

巳為九月四日今增

十月己巳太白犯亢 按原刻己巳一條誤置戊辰前

今移改於戊辰之下

泰定九年二月甲戌江浙行省左丞趙簡請開經筵及  
擇師傅令太子及諸王大臣子孫受學 按江浙原

刻訛浙江今據地理志改

八月敕受者從行省處決以金泉館酒課賜壽寧公主  
按表壽寧公主顯宗之女泰定帝之伯姊二年四月  
封為皇姊大長公主是也通考亦同此處及泰定  
二年四月俱倒書公主壽寧今改

十一月己丑 按前十月乙卯及後十二月癸卯朔計  
之己丑當在十一月原刻無月今增

二年十一月戊申 按十月係戊寅朔以支干推之丙  
午為二十九日戊申則已在三十日外其為十一月

無疑原刻無月今增



欽定四庫全書薈要卷六千四百九史部

元史卷三十

明翰林學士亞中大夫知制誥兼修國史宋濂等修

本紀第三十

泰定帝二

三年春正月丙午朔征東行省左丞相高麗國王王章遣使奉方物賀正旦播州宣慰使楊伊埒布哈招諭蠻酋黎平慶等來降戊申元江路總管普雙叛命雲南行



省招捕之諸王色徹圖鴻和特穆爾來朝賜金銀鈔幣  
有差壬子封諸王庫春布哈為威順王鎮湖廣邁努為  
宣靖王鎮益都各賜鈔三千錠以山東湖廣官田賜民  
耕墾人三頃仍給牛具諸王保賽音遣使獻西馬徵前  
翰林學士吳澄不起置都水庸田司於松江掌江南河  
渠水利己未賜武平王特古斯布哈部軍民鈔人十五  
錠以湘寧王巴拉實哩鎮俄羅斯部辛酉太白犯外屏  
癸亥封圖烈訥為國公以知樞密院事薩題勒密實為

嶺北行中書省平章政事戊辰緬國亂其主答里也伯遣使來乞師獻馴象方物安南國阮叩寇思明路命湖廣行省督兵備之大都路屬縣饑賑糧六萬石恩州水以糧賑之二月丁丑購能首告謀逆厭魅者給賞立賞格諭中外庚辰賑魯王阿哩雅實哩部昂吉爾貧民鈔六萬錠命諸王羅本為大宗正壬午廣西全茗州土官許文傑率諸徭叛寇茗盈州殺知州事李德卿等命湖廣行省督兵捕之以奈瑪台知樞密院事甲申祭太祖

太宗睿宗御容於翰林國史院丁亥中書省請罷征徭  
敕烏爾圖罕等班師其鎮戍者如故己丑禁汴梁路釀  
酒甲午葺真定玉華宮乙未修佛事厭雷于崇天門丙  
申建顯宗神御殿於盧師寺賜額曰大天源延壽寺敕  
以金書西番字藏經戊戌建殊祥寺於五臺山賜田三  
百頃瓜哇國遣使來貢庚子以通政院使察納為中書  
平章事甲辰車駕幸上都命諸王諤特古布哈及中書  
省臣額卜德呼勒察納舒蘓許師敬托多居守立典醫

署秩從五品隸詹事院歸德府屬縣河決民饑賑糧五萬六千石河間保定真定三路饑賑糧四月建昌路饑賑糶米三萬石三月乙巳朔帝以不雨自責命審決重囚遣使分祀五嶽四瀆名山大川及京城寺觀安南國言為龍州萬戶趙雄飛等所侵乞諭還所掠詔廣西道遣官究之丙午填星犯井宿鉞星丁未敕百官集議急務中書省臣等請汰衛士節濫賞罷營繕防猛寇諸寺官署坑冶等事歸中書並從之壬子禳星于司天監癸

丑八番巖霞洞蠻來降願歲輸布二千五百匹設蠻夷  
官鎮撫之乙卯申禁民間金龍文織幣丁巳遣諸王實  
喇鎮北邊戊午詔安撫緬國賜其主金幣甲子命功德  
使司簡歲修佛事一百二十七丙寅翰林承旨額哩音  
特穆爾許師敬譯帝訓成更名曰皇圖大訓教授皇太  
子考試國子生遣僧修佛事於臨洮鳳翔桑嘉勒宗山  
等處賜諸王博羅特穆爾喇特納各鈔二千錠戊辰熒  
惑犯壘壁陣填星犯井庚午填星太白歲星聚于井辛

未泉州民阮鳳子作亂寇陷城邑軍民官以失討坐罪  
永平衛輝中山順德諸路饑賑鈔六萬六千餘錠寧夏  
奉元建昌諸路饑賑糧二月大都河間保定永平濟南  
常德諸路饑免其田租之半四月丙戌鎮安路總管岑  
修廣為弟修仁所攻來告命湖廣行省辨治之戊戌大  
白犯鬼壬寅熒惑犯壘壁陣米洞蠻田先什用等結十  
二洞蠻寇長陽縣湖廣行省遣九姓長官彭呼圖克布  
哈招之田先什用等五洞降餘發兵討之修夏津武河

堤三十三所役丁萬七千五百人五月甲辰朔藩王帕

克必遣使獻豹乙巳修辰類佛事三十一所甘肅行省

臣言赤斤儲粟軍士度川遠給不便請復徙于曲尤之

地從之修上都復仁門涇州饑禁釀酒罷造福建歲供

蔗錫以西僧馳驛擾民禁之甲寅八百媳婦蠻招南道

遣其子招三聽奉方物來朝乙卯以帝師兄索諾木藏

布領西番三道宣慰司事尚公主錫王爵給壽寧公主

印賜田百頃鈔三萬錠甲子中書會歲鈔出納之數請

節用以補不足從之監察御史劾宣撫使多爾濟巴勒  
學士李塔喇海劉紹祖庸鄙不勝任中書議三人皆勲  
舊子孫罪無實狀乞復職仍敕憲臺勿以空言妄劾從  
之丁卯岑世興及鎮安路岑修文合山獠角蠻六萬餘  
人為寇命湖廣雲南行省招諭之遣指揮使鄂都瑪勒  
鐫西番咒語于居庸關庚午竒珠招諭永明縣五洞徭  
來降河西加木籠四部來降以達爾瑪巴勒藏布領布  
喇哈瑪納部哀噶巴勒領古嚕諾爾布古允松喇卜藏



布爾沙克嘉部索諾木置勒藏布領喇卜藏衮卜喇卜

齊伊實格埒古實部多爾濟巴拉領隆丹策凌巴勒喇

卜坦噶勒藏部雄州饑太平興化屬縣水賑之廬州鬱

林州及洪澤屯田旱揚州路屬縣財賦官田水並免其

租六月癸酉朔賜藩王徹伯爾七寶束帶以托海特穆

爾為四川行省平章政事請終母喪從之癸未播州蠻

黎平愛復叛合謝烏窮為寇宣撫使楊伊埒布哈招平

愛出降烏窮不附命湖廣行省討之丁亥命湘寧王巴

拉實哩出鎮阿南達實迪之地戊子諸王托克托等來  
朝賜金銀鈔幣乙未命梁王旺沁及諸王齊齊克圖鎮  
撫北軍賜旺沁鈔五千錠幣帛各二百匹丁酉遣道士  
吳全節修醮事於龍虎三茅閣良三山戊戌遣使祀解  
州鹽池神中書省臣言比郡縣旱蝗由臣等不能調燮  
故災異降戒今當恐懼儆省力行善政亦冀陛下敬慎  
修德憫恤生民帝嘉納之賑昌王巴拉實哩部鈔四萬  
錠賜吳王普爾普鈔萬錠己亥納皇姊壽寧公主女薩

都邑拉於中宮道州路櫟所源搖為寇命竒珠捕之奉元  
鞏昌屬縣大雨雹峽州旱東平屬縣蝗大同屬縣大水  
萊蕪等處治戶饑賑鈔三萬錠光州水中山安喜縣雨  
雹傷稼大昌屯河決大寧廬州德安梧州中慶諸路屬  
縣水旱並蠲其租秋七月甲辰車駕發上都禁車騎踐  
民禾遼王托克托請復大母諤楞宮守兵及女直屯戶  
不允增給太祖四大鄂爾多歲賜銀二百錠鈔八千錠  
遣使祀海神天妃造麋豹羶車三十兩乙巳齊哩克昆

屯田霜賑糧二月丙午享太廟丁未紹慶酉陽寨冉世  
昌及何惹洞蠻為寇詔行宮馳馬及宗戚將校駐冬北  
邊者毋輒至京師辛亥封阿都齊為綏寧王賜鈔四千  
錠給金印壬子皇后受雅滿達噶戒于水晶殿甲寅幸  
大乾元寺敕鑄五方佛銅像乙卯詔翰林侍講學士阿  
魯威直學士雅奇譯世祖聖訓以備經筵進講戊午諸  
王保賽音獻馳馬遣日本僧瑞興等四十人還國作別  
殿於潛邸敕入粟拜官者准致仕銓格己未禁諸部王

妃入京告饑以伊嚕特穆爾嗣齊王給金印八百媳婦  
蠻招南通遣使來獻馴象方物乙丑發兵修野狐色澤  
桑乾三嶺道戊辰太白經天己巳大理土官你囊來獻  
方物庚午廣西宣慰副使王瑞請益戍兵及以土民屯  
田備蠻仍置南寧安撫司河決鄭州陽武縣漂民萬六  
千五百餘家賑之永平大都諸屬縣水大風雨雹龍興  
辰州二路火大名永平奉元諸路屬縣旱汴梁路水大  
名順德衛輝淮安等路睢趙涿霸等州及諸位屯田蝗

大同渾源河溢檀順等州兩河決溫榆水溢賑永平奉  
元鈔七萬錠賑糶濠州饑民麥三萬九千餘石命瘞京  
城外棄骸死狀不白者有司究之八月甲戌額卜德呼  
勒許師敬以災變饑歉乞解政柄不允乙亥遣奈瑪台  
簡閱邊兵賜鈔千錠大天源延聖寺神御殿成戊寅修  
澄清石牯甲申享太廟長春宮道士藍道元以罪被黜  
詔道士有妻者悉給徭役遷黃羊坡民二百五十戶於  
韃靼部寧遠州洞蠻刁用為寇命雲南行省備之丁亥

遣梁王旺沁整飭鄂爾多斯邊事辛卯雲南行省丞相  
伊爾濟達廉訪副使沙卜珠丹以使酒相詆狀聞詔兩  
釋之甲午以災變罷獵賑河南特默齊軍籍其餘丁罷  
行宣政院及功德使司免武備寺逋負兵器丁酉藩王  
保賽音獻玉及獨峯駝是夜太白犯軒轅御女以星變  
下詔恤民辛丑次中都政于翁果察圖之地賜太師阿  
勒坦綽克鈔二千八百錠蓋頂殿成罷甘肅扎昆倉徙  
其軍儲於瓮鄂羅倉戶部尚書郭良坐贓免作天妃宮

于海津鎮西番土官撒加布來獻方物海寇黎三來附  
詔諭廉州蚤戶使復業鹽官州大風海溢壞隄防三十  
餘里遣使祭海神不止徙居民千二百五十家大都昌  
平大風壞民居九百家龍慶路雨雹一尺大風損稼真  
定蠡州奉元蒲城等縣及無為州諸處水河中府永平  
建昌印都中慶太平諸路及廣西兩江饑並發粟賑之  
揚州崇明州大風雨海水溢溺死者給棺斂之杭州火  
賑糧一月九月丁未增置上都留守判官一員兼推官



辛亥命帝師還京修灑淨佛事于大明興聖隆福三宮

丁巳弛大都上都興和酒禁庚申車駕至大都壬戌以

察納領度支事癸亥太白犯太微垣右執法賜大車里

新附蠻官七十五人表帽鞞靴戊辰命罕齊等使諸王

徹伯爾諤斯伯保賽音三部賑濟邨貧民鈔二十萬錠

湖廣行省太平路總管郭扶雲南行省威楚路禿刺寨

長哀培景東寨長阿只弄男阿吾大阿哀寨主弟你刀

木羅寨長哀卜利茫施路土官阿利鎮江路土官泥囊

弟陀金容木帖路土官邱羅大車里昭哀姪哀用孟隆  
甸土官吾仲並奉方物來獻以昭哀地置木朶路一木  
來州一甸三以吾仲地置孟隆路一甸一以哀培地置  
甸一並降金符銅印仍賜幣帛鞍勒有差中書省臣言  
今國用不繼陛下當法世祖之勤儉以為永圖臣等在  
職苟有濫承恩賞者必當回奏帝嘉納之揚州寧國建  
德諸屬縣水南恩州旱民饑並賑之汾州平遙縣汾水  
溢廬州懷慶二路蝗冬十月辛未朔發卒四千治通州

道給鈔千六百錠甲戌寧珠陞右御史大夫庚辰享太廟奉安顯宗御容於大天源延聖寺辛巳太白犯進賢天壽節遣道士祠衛輝太一萬壽宮壬午帝師以疾還薩斯嘉之地賜金銀鈔幣萬計敕中書省遣官從行備供億癸未河水溢汴梁路樂利堤壞役丁夫六萬四千人築之京師饑發粟八十萬石減價糴之賜大天源延聖寺鈔二萬錠吉安臨江二路田千頃中書省臣言養給軍民必藉地利世祖建大宣文宏教等寺賜永業當

時已號虛費而成宗復構天壽萬寧寺較之世祖用增  
倍半若武宗之崇恩福元仁宗之承華普慶租權所入  
益又甚焉英宗鑿山開寺損兵傷農而卒無益夫土地  
祖宗所有子孫當共惜之臣恐茲後藉為口實妄興工  
役徼福利以逞私欲惟陛下察之帝嘉納焉十一月庚  
子朔陝西行臺中丞姚煒請集世祖嘉言善行以時省  
覽從之潘陽遼陽大寧等路及金復州水民饑賑鈔五  
萬錠懷慶修武縣旱免其租寧夏路萬戶府慶遠安撫

司饑賑之弛寧夏路酒禁宣撫使瑪哈穆特李讓劾浙  
西廉訪使諤勒哲布哈受賂簿對不服詔遣刑部郎中  
索珠鞫其侵辱使者笞之藩王保賽音遣使獻虎癸卯  
中書省臣言西僧每假元辰疏釋重囚有乖政典請罷  
之有旨自今當釋者敕宗正府審覆乙巳梁王旺沁往  
北邊賜鈔二千錠己酉作盂頂棕樓辛亥追復前平章  
政事李孟官賜湘寧王巴拉實哩鈔三千錠諸王保賽  
音使來獻馬乙卯太白犯鍵閉廣西透江團搖為寇宣

慰使邁努諭降之扶靈青溪櫟頭等源蠻為寇湖南道  
宣慰司遣使諭降之戊午造中統至元鈔各十萬錠封  
諸王特穆爾布哈為鎮南王鎮揚州辛酉加御史大夫  
寧珠開府儀同三司加封廬陵江神曰顯應弛成都酒  
禁播州蠻宋王保來降己巳徙上都清寧殿于巴雅爾  
行宮弛永平路山澤之禁階州土蕃為寇武靖王遣臨  
洮路元帥珠展諭降之廣寧路屬縣霖雨傷稼賑鈔三  
萬錠沔陽府旱免其稅永平路大水免其租仍賑糧四

月汴梁建康太平池州諸路及甘肅額齊訥路饑並賑  
之錦州水溢壞田千頃漂死者百人人給鈔一錠崇明  
州海溢漂民舍賑糧一月給死者鈔二十貫十二月丁  
丑諸王諤斯伯獻文豹賜金銀鈔幣有差御史哈喇諾  
海請擇正人傳太子帝嘉納之壬午御史賈瑩請祔武  
宗皇后于太廟不報敕以來年元夕構燈山于內廷御  
史趙師魯以水旱請罷其事從之甲申師魯又請親祀  
郊廟帝嘉納之丙戌以回回陰陽家言天變給鈔二千

錠施有道行者及乞人繫囚以禳之丁亥寧夏路地震  
有聲如雷連震者四庚寅赦天下召江浙行省右丞趙  
簡為集賢大學士領經筵事壬辰賜梁王旺沁宴器金  
銀以皇子錫錫夜啼賜高年鈔癸巳作盂頂殿己亥命  
帝師修佛事釋重囚三人置大承華普慶寺總管府罷  
規運提點所御史言比年營繕以衛軍供役廢武事不  
講請遵世祖舊制教習五衛親軍以備扈從不報湖廣  
屯戍千戶濟雅干布哈招諭扶靈洞蠻劉季等來降保



定路饑賑米八萬一千五百石懷慶路饑賑鈔四萬錠  
亳州河溢漂民舍八百餘家壞田二千三百頃免其租  
廣西靜江象州諸路及遼陽路饑賑之大寧路大水壞  
田五千五百頃漂民舍八百餘家溺死者人給鈔一

錠

四年春正月甲辰諸王邁努來朝賜金一錠銀十錠鈔  
二千錠幣帛各四十匹乙巳御史臺臣請親祀郊廟帝  
曰朕遵世祖舊制其命大臣攝之己酉太白犯牛庚戌

置紹慶路石門十寨巡檢司御史辛鈞言西商鬻寶  
動以數十萬錠今水旱民貧請節其費不報壬子以中  
政院金銀鐵冶歸中書靖安王扣布哈出鎮陝西詔賜  
鈔二千錠癸丑賜諸王喇特納實哩等鈔六千錠甲寅  
鷹師托克托病賜鈔千錠戊午命市珠寶首飾庚子皇  
子允丹藏布受佛戒于智泉寺鹽官州海水溢壞捍海  
堤二千餘步甲子武龍洞蠻寇武緣縣諸堡丁卯燕南  
廉訪司請立真定常平倉不報浚會通河築鄴州護倉

堤役丁夫三萬人初置雲南行省檢校官遼陽行省諸  
郡饑賑鈔十八萬錠彰德淮安揚州諸路饑賑之大寧  
路水給溺死者人鈔一錠二月辛未祀先農甲戌祭太  
祖太宗睿宗御容于大承華普慶寺以翰林院官執事  
乙亥親王額森特穆爾出鎮北邊賜金一錠銀五錠鈔  
五百錠幣帛各十匹丙子命伊拉齊領仁宗神御殿事  
大司徒淋沁策喇實為大承華普慶寺總管府達嚕噶  
齊仍為大司徒壬午狩于鄯州諸王呼實噶溫都爾出

鎮北邊賜金銀幣鈔有差帝師燦默特伊實結布姜楚  
卜札卜卒命達實特穆爾寧珠監修佛事丙戌詔同僉  
樞密院事雅克特穆爾教閱諸衛軍戊子進襲封衍聖  
公孔思晦階嘉議大夫以默古斯為雲南行省平章政  
事提調烏蒙屯田庚寅八百媳婦蠻酋招南通來獻方  
物辛卯白虹貫日以尚供總管府及雲需總管府隸上  
都留守司奉元廬州淮安諸路及白登部饑賑糧有差  
永平路饑賑鈔三萬錠糧二月三月辛丑皇子允丹藏

布出鎮北邊以諾海齊為惠國公商議內史府事癸卯  
和寧地震有聲如雷丙午廷試進士阿恰齊李黼等八  
十五人賜進士及第出身有差命西僧作止風佛事潮  
州路判官錢珍挑推官梁楫妻劉氏不從誣楫下獄殺  
之事覺珍飲藥死詔戮尸傳首海北廉訪副使劉安仁  
坐受珍賂除名辛亥諸王吹巴勒保賽音等以文豹西  
馬佩刀珠寶等物來獻賜金鈔萬計庚申遣使往江南  
求竒花異果辛酉以太傅托迪為太師太保圖古勒為

太傅伊克托爾古齊博迪蘇為太保敕前太師布呼與  
議大事食其俸終身召翰林學士承旨蔡國公張珪集  
賢大學士廉恂太子賓客王毅復舊職陝西行臺中丞  
敬儼為集賢大學士並商議中書省事珪仍預經筵事  
賜諸王和碩部鈔四千錠郡王多喇烏嚕古等部畜牧  
災賑鈔三萬五千錠中書省臣請酬哈克織等累朝售  
寶價鈔十萬二千錠從之壬戌車駕幸上都復設武備  
寺同判六員命親王巴拉實哩出鎮察汗諾爾封庫春

為國公以阿繖和卓知樞密院事渾河決發軍民萬人  
塞之丁卯熒惑犯井復置衛候直都指揮使司秩正四  
品諸王保賽音遣使獻文豹獅子賜鈔八千錠大寧廣  
平二路屬縣饑賑鈔二萬八千錠河南行省諸州縣及  
建康屬縣饑賑糧有差夏四月辛未盜入太廟竊武宗  
金主及祭器大理鹿甸酋阿你為寇壬申作武宗主甲  
戌作棕毛盃頂樓已卯道州永明縣徭為寇癸未鹽官  
州海水溢侵地十九里命都水少監張仲仁及行省官

發工匠二萬餘人以竹落木柵實石塞之不止癸巳高  
州徭寇電白縣千戶張恒力戰死之邑人立祠敕賜額  
曰旌義甲午以西僧袞噶伊實巴絀喇實嘉勒燦巴勒  
藏布為帝師賜玉印仍詔諭天下僧乙未以武備寺卿  
阿薩爾達爾罕為御史大夫崇星于回回司天臺湖廣  
徭寇全州義寧屬縣命守將捕之河南奉元二路及通  
順檀薊等州漁陽寶坻香河等縣饑賑之河間揚州建  
康太平衢州常州諸路屬縣及雲南烏撒武定二路饑



賜糧鈔有差永平路饑免其租仍賑糧兩月五月辛丑

太尉超爾卒癸卯以鹽官州海溢命天師張嗣成修醮

禳之乙巳作成宗神御殿于天壽萬寧寺己未占城國

遣使貢方物甲子以典守宗廟不嚴罷太常禮儀院官

丁卯修佛事於賀蘭山及諸行宮罷諸王分地州縣長

官世襲俾如常調官以三載為考元江路總管普雙坐

贓免遂結蠻兵作亂救復其舊職德慶路搖來降歸所

掠男女悉給其親河南江陵屬縣饑賑糧有差汴梁屬

縣饑免其租常州淮安二路寧海州大雨雹睢州河溢  
大都南陽汝寧廬州等路屬縣旱蝗衛輝路大風九日  
禾盡偃河南路洛陽縣有蝗可五畝羣鳥食之既數日  
蝗再集又食之六月辛未翰林侍講學士阿魯威直學  
士雅竒等進講仍命譯資治通鑑以進參知政事火惟  
良請解職歸養不允丁丑都爾蕪等以災變乞罷不允  
罷兩都營繕工役錄諸郡繫囚已卯永興屯被災免其  
租辛巳造象輿六乘癸未遣察納巴延赴大都銓選甲

申廣西花角蠻為寇命所部討之乙未紹慶路四洞酋  
阿者等降並命為蠻夷長官仍設巡檢司以撫之發義  
倉粟賑鹽官州民廬州路饑賑糧七萬九千石鎮江興  
國二路饑賑糶有差中山府雨雹汴梁路河決汝寧府  
旱大都河間濟南大名峽州屬縣蝗秋七月丁酉朔元  
江路普雙復叛戊戌諸王揚珠濟達襲位遣使來朝己  
亥巴喇呼部鴻和來獻方物御史臺臣言內郡江南旱  
蝗荐至非國細故丞相達實特穆爾都爾蕪參知政事

布哈史惟良參議邁努並乞解職有旨毋多辭朕當自  
做卿等亦宜各欽厥職修大明殿占城國獻馴象二建  
橫渠書院於郿縣祠宋儒張載辛丑賜齊王伊魯特穆  
爾鈔二萬錠甲辰播州蠻謝烏窮來獻方物丙午享太  
廟丁未敕經筵講讀官非有代不得去職諭宗正府決  
獄遵世祖舊制戊戌遣翰林侍讀學士阿魯威還大都  
譯世祖聖訓壬子賜諸王和爾和伊魯特穆爾巴拉實  
哩及駙馬滿濟勒噶鈔萬五千錠金銀幣帛有差甲寅

遣使市旄牛於西域丁巳給齊王伊嚕特穆爾印巴延  
徹爾額卜德呼勒以疾乞解政優詔諭之戊午謀粘路  
土官賽丘羅招諭八百媳婦蠻招三斤來降銀沙羅土  
官散怯遮殺賽邱羅敕雲南王遣人諭之癸亥賜壽寧  
公主鈔五千錠岐王索諾木袞布訢荆王伊蘓額布根  
侵其地命甘肅行省閱籍歸之乙丑周王和實拉及諸  
王揚珠濟達等來貢賜金銀鈔幣有差遣使祀海神天  
妃丙寅籍僧道有妻者為民塞保安鎮渠役民丁六千

人是月籍田蝗雲州黑河水溢衢州大雨水發廩賑饑者給漂死者棺延安屬縣旱免租稅遼陽遼河婁薩竒河溢右衛率部饑賑之八月戊辰給累朝鄂爾多鈔有差癸酉給必克楚喇實寧國公印度支監卿博囉請辭職奉母不允賜皇后乳母鈔千七百錠淳沱河水溢發丁浚治河以殺其勢奉元路治中單鵠言令民採捕珍禽異獸不便請罷之敕應獵者其捕以進乙亥賜公主布達實哩媵戶鈔四千錠苗人祭伯秧寇李陀寨命湖

廣行省捕之庚辰運粟十萬石貯瀕河諸倉備內郡饑  
田州洞獠為寇遣湖廣行省捕之癸未賜營王額森特  
穆爾鈔三千錠乙酉巴雅爾鄂爾多作欽明殿成壬辰  
御史李昌言河南行省平章政事通通世官河南大為  
奸利請徙他鎮不報癸巳諡武宗皇后曰宣慈惠聖英  
宗皇后曰莊靜懿聖升祔太廟發衛軍八千修白浮瓮  
山河堤是月揚州路崇明州海門縣海水溢汴梁路扶  
溝蘭陽縣河溢沒民田廬並賑之建德杭州衢州屬縣

水真定晉寧延安河南等路屯田旱大都河間奉元懷  
慶路蝗鞏昌府通漕縣山崩碣門地震有聲如雷晝晦  
天全道山崩飛石斃人鳳翔興元成都峽州江陵同日  
地震九月丙申朔日有食之阿恰齊德濟獻木綿大行  
帳敕國子監仍舊制歲貢生員業成者六人禁僧道買  
民田違者坐罪沒其直壬寅寧夏路地震壬子太白犯房  
甲寅湖廣土官宋王保獻方物壬戌遣罕齊等使諸王  
徹伯爾等部甲子御史言廣海古流放之地請以職官



賊汚者處之以示懲戒從之保定真定二路饑賑糧三

萬石鈔萬五千錠閏月丁卯賜諸王色徹圖呼圖克特

穆爾鈔各五千錠己巳太白經天車駕至大都壬申以

災變赦天下廣西兩江徭為寇命所部捕之甲戌命祀

天地享太廟祭五嶽四瀆名山大川甲午八百媳婦蠻

請官守置蒙慶宣慰司都元帥府及木安孟傑二府于

其地以同知烏撒宣慰司事你出公土官招南通並為

宣慰司都元帥招諭人米德為同知宣慰司事副元帥

南通之子招三斤知木安府姪混盆知孟傑府仍賜鈔  
幣各有差建昌贛州惠州諸路饑賑米四萬四千石土  
番階州饑賑鈔千五百錠奉元慶遠延安諸路饑賑糶  
有差冬十月丙申享太廟戊戌諸王圖卜特穆爾哈爾  
滿等獻玉及蒲萄酒賜鈔六千錠己亥御史德珠請擇  
東宮官癸卯命帝師作佛事于大天源延聖寺甲辰改  
封建德路烏龍山神曰忠顯靈澤普佑字惠王乙巳晝  
有流星己酉以治書侍御史王士熙為參知政事辛亥

監察御史伊克埒塔卜台言都水庸田使司擾民請罷之癸丑江浙行省左丞相托歡達爾罕平章政事高昉以海溢病民請解職不允雲南沙木寨土官馬愚等來朝丁巳以御史中丞趙世延為中書右丞以中書參議傅巖起為吏部尚書御史韓鏞言尚書三品秩巖起由吏累官四品於法不得陞制可安南遣使來獻方物戊午辰星犯東咸監察御史馮思忠請命太常纂修累朝禮儀壬戌開南州土官阿只弄率蠻兵為寇雲南行省

招捕之增置肅州沙州額齊訥三路推官大都路諸州  
縣霖雨水溢壞民田廬賑糧二十四萬九千石衛輝獲  
嘉等縣饑賑鈔六千錠仍蠲丁地稅龍興路屬縣旱免  
其租大名河間二路屬縣饑並賑之十一月庚午禁晉  
寧路釀酒減價糶京倉米十萬石以賑貧民以思州土  
官田仁為思州宣慰使召雲南王特穆爾布哈赴上都  
癸酉太白犯壘壁陣乙亥熒惑犯天江丙子賜公主布  
達實哩鈔千錠平樂府徭為寇湖廣行省督兵捕之辛

卯以降蠻謝烏窮為蠻夷官雲南蒲蠻來附置順寧府  
寶通州慶甸縣緬國主答里必牙請復立行省於迷郎  
崇城不允布斯來附給巴雅爾鄂爾多駝牛以歲饑開  
內郡山澤之禁永平路水旱民饑蠲賦三年諸王塔斯  
布哈部衛士饑賑糧千石冀寧路陽曲縣地震十二月  
庚子發米三十萬石賑京師饑絳州太平縣趙氏婦一  
產三子定捕盜令限內不獲者償其贓辛丑敕達實特  
穆爾都爾蘇領內史府四鄂爾多事癸卯安南遣使來

貢方物甲辰梧州徭為寇湖廣行省督兵捕之戊申諸  
王博羅遣使貢硃砂賜鈔二千錠癸丑命趙世延及中  
書參議韓讓左司郎中姚庸提調國子監乙卯瓜哇遣  
使獻金文豹白猴白鸚鵡各一蔡國公張珪卒植萬歲  
山花木八百七十本丙辰賜諸王博囉特穆爾等鈔四  
千錠己未歲星退犯太微西垣上將靜江路徭兵為寇  
湖廣行省督兵捕之右江諸寨土官岑世忠等來獻方  
物大都保定真定東平濟南懷慶諸路早免田租之半

河南河間延安鳳翔屬縣饑並賑之是歲汴梁延安汝  
寧峽州旱濟南衛輝濟寧南陽諸路屬縣蝗汴梁諸屬  
縣霖雨河決揚州路通州崇明州大風海溢

致和元年春正月乙丑朔高麗王遣使來朝賀獻方物  
甲戌享太廟命繪蠶麥圖乙亥詔諭百司凡不赴任及  
擅離職者奪其官避差遣者笞之御史鄒惟亨言時享  
太廟三獻官舊皆勳戚大臣而近以戶部尚書為亞獻  
人既疎遠禮難嚴肅請仍舊制以省臺樞密宿衛重臣

為之丁丑頒農桑舊制十四條于天下詔勵有司以察  
勤惰己卯帝將畋柳林御史王獻等以歲饑諫帝曰其  
禁衛士毋擾民家命御史二人巡察之諸王桑節巴勒  
部饑賑鈔萬錠米五千石占城遣使來貢方物且言為  
交趾所侵詔諭解之禁僧道匿商稅給宗仁衛蒙古子  
女糧六月辛巳靜江徭寇靈川臨桂二縣命廣西招捕  
之甲申遣使祀海神天妃戊子詔優護瓜哇國主札牙  
納哥仍賜衣物弓矢罷河南鐵冶提舉司歸有司命帝



師修佛事于禁中免陝西撈鹽一年發卒修京城罷益都諸屬縣食鹽加封幸淵龍神福應昭惠公河間真定順德諸路饑賑鈔萬一千錠大都路東安州大名路白馬縣饑並賑之二月癸卯弛汴梁路酒禁乙卯伊濟遣使藏古來貢方物庚申詔天下改元致和免河南自實田糧一年被災州郡稅糧一年流民復業者差稅三年疑獄繫三歲不決者釋之賜遼王托克托鈔五千錠梁王旺沁鈔二千錠壬戌太白晝見癸亥解州鹽池黑龍

堰壞調番休鹽丁修之陝西諸路饑賑鈔五萬錠河間  
汴梁二路屬縣及開城乾州蒙古軍饑並賑之三月庚  
午阿蘓衛兵出戍者千人人給鈔四十錠貧乏者六千  
一百人人給米五石雲南安隆寨土官岑世忠與其兄  
世興相攻籍其民三萬二千戶來附歲輸布三千匹請  
立宣撫司以總之不允置州一以世興知州事置縣二  
聽世忠舉人用之仍諭其兄弟共處立萬戶府二領征  
西紅胖裨軍達實特穆爾都爾蘓言災異未弭由官吏

以罪黜罷者怨誹所致請量才敘用從之辛未大天源  
延聖寺顯宗神御殿成置總管府以司財賦壬申雨雹  
甲戌雅濟國遣使獻方物己卯帝御興聖殿受無量壽  
佛戒于帝師庚辰命僧千人修佛事于鎮國寺辛巳賜  
壽寧公主鹽價鈔萬引甲申遣戶部尚書李嘉努往鹽  
官祀海神仍集議修海岸丙戌詔帝師命僧修佛事于  
鹽官州仍造浮屠二百一十六以厭海溢戊子車駕率  
上都己丑以趙世延知經筵事趙簡預經筵事阿魯威

同知經筵事曹元用吳秉道虞集段輔馬祖常雅竒富  
珠哩翀並兼經筵官雲南土官撒加布降奉方物來獻  
置州一以撒加布知州事隸羅羅宣慰司徵其租賦壬  
辰太平路當塗縣楊氏婦一產三子晉寧衛輝二路及  
泰安州饑賑鈔四萬八千三百錠冀寧路平定州饑賑  
糶米三萬石陝西四川及河南府等處饑並賑之夏四  
月丙申欽州徭黃焱等為寇命湖廣行省備之己亥達  
實特穆爾都爾蘓請凡蒙古色目人効漢法丁憂者除

其名從之壬寅李嘉努以作石因捍海議聞己酉御史  
楊倬等以民饑請分僧道儲粟濟之不報甲寅改封蒙  
山神曰嘉惠昭應王鹽池神曰靈富公洞庭廟神曰忠  
惠順利靈濟昭佑王唐柳州刺史柳宗元曰文惠昭靈  
公戊午禁偽造金銀器皿大都東昌大寧汴梁懷慶之  
屬州縣饑發粟賑之保定冠州德州般陽彰德濟南屬  
州縣饑發鈔賑之是月靈州濬州大雨雹薊州及岐山  
石城二縣蝗廣寧路大水崇明州大風海溢五月甲子

遣官分護流民還鄉仍禁聚至千人者杖一百丙寅廣西普寧縣僧陳慶安作亂僭建國改元己巳八百媳婦蠻遣子哀招獻馴象癸酉籍在京流民廢疾者給糧遣還大理怒江甸土官阿哀你寇樂辰諸寨命雲南行省督兵捕之庚辰有流星大如缶其光燭地甲申安南國及八洞蠻酋遣使獻方物戊子以嶺北行省平章政事達實特穆爾為中書平章政事是月燕南山東東道及奉元大同河間河南東平濮州饑賑鈔十四萬三千餘

錠峽州屬縣饑賑糶糧五千石冀寧廣平真定諸路屬  
縣大雨雹汝寧府潁州衛輝路汲縣蝗涇州靈臺縣旱  
六月高麗世子完者禿訴取其印遣平章政事瑪魯往  
諭高麗王俾還之丙午遣使祀世祖神御殿是月諸王  
諾木達實齊齊克圖和碩奈瑪台諸部風雪斃畜牧士  
卒饑賑糧五萬石鈔四十萬錠奉元延安二路饑賑鈔  
四千八百九十錠彰德屬縣大雨雹南寧開元永平諸  
路水江陵路屬縣旱河南安德屯獲食桑秋七月辛酉

朔寧夏地震庚午帝崩壽三十六葬起輦谷己卯大寧  
路地震癸未修佛事于欽明殿乙酉皇后皇太子降旨  
諭安百姓丙戌太白犯軒轅大星九月都爾蘇立皇太  
子為皇帝改元天順詔天下泰定之世災異數見君臣  
之間亦未見其引咎責躬之實然能知守祖宗之法以  
行天下無事號稱治平茲其所以為足稱也



元史卷三十

元史卷三十考證

三年二月己丑 按己丑原刻作乙丑以支干推之丁亥甲午之間無乙丑自係己丑之訛今改

二月戊戌建殊祥寺於五臺山 按戊戌原刻誤作甲

戌考宏簡錄建殊祥寺係戊戌非甲戌以前後支干推之亦同今改

六月丁酉遣道士吳全節修醮事於龍虎三茅閣皂三山 按茅刻本作茆考二字雖可通用但三茅以茅

君姓得名應作茅為是今改

十一月庚子朔 按十月辛未朔至己亥為二十九日

庚子既在十一月則當為朔日矣原刻闕書朔字今  
增

十二月丁丑 按自庚子朔推至己巳足一月之數  
此下即十二月矣應於丁丑上紀月分以清界限原  
刻闕書今據宏簡錄增

四年四月癸巳高州徭寇電白縣千戶張恒力戰死之

按死狴亂之千戶宋元通鑑宏簡錄均作張恒大典亦同原刻訛恒為額今改

四年濟南衛輝濟寧南陽諸路屬縣蝗 按史文止四處原刻作八路考五行志是歲蝗凡十餘處又不止八路也今改





總校官編修臣吳紹潔

欽定四庫全書薈要

史部  
元史卷三十一至

詳校官主事銜臣徐以坤



欽定四庫全書蒼要卷六千四百十 史部

元史卷三十一

明翰林學士亞中大夫知制誥兼修國史宋濂等修

紀第三十一

明宗

明宗翼獻景孝皇帝諱和實拉武宗長子也母曰仁獻章聖皇后伊奇哩氏成宗大德三年命武宗撫軍北邊帝以四年十一月壬子生成宗崩十一月武宗入繼大



統立仁宗為皇太子命以次傳於帝武宗崩仁宗立延祐三年春議建東宮時丞相特們德爾欲固位取寵乃議立英宗為皇太子又與太后幸臣實勒們譖帝於兩宮浸潤久之其計遂行於是封帝為周王出鎮雲南置常侍府官屬以遥授中書左丞相圖古勒大司徒鄂爾多中政使尚嘉努山北遼陽等路蒙古軍萬戶博囉翰林侍講學士嘉琿等並為常侍中衛親軍都指揮使唐古兵部尚書賽堪巴圖爾為中尉仍置諮議記室各二

員遣就鎮是年冬十一月帝次延安圖古勒尚嘉努博囉及武宗舊臣哩日沙布鼎哈瑪爾圖等皆來會嘉琿謀曰天下者我武皇之天下也出鎮之事本非上意由左右搆間致然請以其故白行省俾聞之朝廷庶可杜塞離間不然事變巨測遂與數騎馳去先是阿斯罕為太師特們德爾奪其位出之為陝西行省丞相及嘉琿等至即與平章政事塔齊爾行臺御史大夫圖魯卜中丞托歡悉發關中兵分道自潼關河中府入己而塔齊

爾托歡襲殺阿斯罕嘉琿于河中帝遂西行至北邊金山西北諸王察克台等聞帝至咸率衆來附帝至其部與定約束每歲冬居扎延夏居阿嚕噶察山春則命從者耕于約尼十餘年間邊境寧謐延祐七年仁宗崩英宗立是歲夏四月丙寅子托歡特穆爾生是為至正帝至治三年八月癸亥御史大夫特克實等弒英宗晉王伊蘇特穆爾自立為皇帝改元泰定五月遣使扈從皇后班布爾實至自京師二年帝弟圖卜特穆爾以懷王

出居于建康三年三月癸酉子伊埒哲伯生是為寧宗  
歲戊辰七月庚午秦定皇帝崩于上都都爾蘇專權踰  
月不立君朝野疑懼時僉樞密院事雅克特穆爾留守  
京師謀舉義八月甲午黎明召百官集興聖宮兵皆露刃  
號於衆曰武皇有聖子二人孝友仁文天下歸心大統  
所在當迎立之不從者死乃縛平章額卜德呼勒巴延  
徹爾以中書左丞托多參知政事王士熙等下于獄雅  
克特穆爾與西安王喇特納實哩固守內廷於是帝方

遠在沙漠猝未能至慮生他變乃先迎帝弟懷王于江陵且宣言已遣使北迎帝以安衆心復矯稱帝所遣使者自北方來云周王從諸王兵整駕南轅旦夕即至矣丁巳懷王入京師羣臣請正大統固讓曰大兄在北以長以德當有天下必不得已當明以朕志播告中外九月壬申懷王即位是為文宗改元天厯詔天下曰謹俟大兄之至以遂朕固讓之心時都爾蘇在上都立泰定皇帝子為皇帝乃遣兵分道犯大都而梁王旺沁右丞

相達實特穆爾御史大夫寧珠太尉布哈等兵皆次於  
榆林雅克特穆爾與其弟薩都子騰吉斯等帥師與戰  
屢敗之上都兵潰十月辛丑齊王伊嚕特穆爾元帥布  
哈特穆爾以兵圍上都都爾蘇乃奉皇帝寶出降兩京  
道路始通於是文宗遣哈克繖及薩題等來迎朔漠諸  
王勸帝南還京師遂發北邊諸王察克台沿邊元帥圖  
呼訥萬戶瑪魯等咸帥師扈行舊臣博囉尚嘉努哈瑪  
爾圖皆從至金山嶺北行省平章政事普爾普奉迎武

寧王齊濟克圖僉樞密院事特穆爾布哈繼至乃命博  
囉如京師兩京之民間帝使者至驩舞曰吾天子實自  
北來矣諸王舊臣爭先迎謁所至成聚天曆二年正月  
乙丑文宗復遣中書左丞伊爾特穆爾來迎乙酉薩題  
等至入見帝於行幄以文宗命勸進丙戌帝即位于和  
寧之北扈行諸王大臣咸入賀乃命薩題遣人還報京  
師是月前翰林學士承旨布達實哩以太府太監實喇  
卜輦金銀幣帛至遣薩題等還京師帝命之曰朕弟曩

嘗覽觀書史邇者得無廢乎聽政之暇宜親賢士大夫  
講論史籍以知古今治亂得失卿等至京師當以朕意  
諭之二月壬辰宣靖王邁努自京師來覲辛丑追尊皇  
妣伊奇哩氏曰仁獻章聖皇后是月文宗立奎章閣學  
士院于京師遣人以除目來奏帝並從之三月戊午朔  
次格根察罕之地辛酉文宗遣右丞相雅克特穆爾奉  
皇帝寶來上御史中丞巴濟拉知樞密院事圖勒噶特  
穆爾等率其屬以從壬戌造乘輿服御及近侍諸服用丙



寅帝謂中書左丞伊爾特穆爾曰朕至上都宗藩諸王必皆來非尋常朝會比諸王察克台今亦從朕遠來有司供張皆宜豫備其與中書臣僚議之丁亥雨土霾四月癸巳雅克特穆爾見帝於行在率百官上皇帝寶帝嘉其勲拜太師仍命為中書右丞相開府儀同三司上柱國錄軍國重事監修國史達爾罕太平王並如故復諭雅克特穆爾等曰凡京師百官朕弟所用者並仍其舊卿等其以朕意諭之雅克特穆爾奏陛下君臨萬方

國家大事所繫者中書省樞密院御史臺而已宜擇人居之帝然其言以武宗舊人哈瑪爾圖為中書平章政事前中書平章政事拜特穆爾知樞密院事常侍博囉為御史大夫甲午立行樞密院命昭武王赫伯知樞密院事和碩領行樞密院事賽音特穆爾邁努並同知行樞密院事是日帝晏諸王大臣雅克特穆爾哈瑪爾圖拜特穆爾博囉等侍帝特命臺臣曰太祖皇帝嘗訓臣下云美色名馬人皆悅之然方寸一有繫累即能壞名

敗德卿等居風紀之司亦嘗念及此乎世祖初立御史臺首命塔齊爾巴特嘉勒二人協司其政天下國家譬猶一人之身中書則右手也樞密則左手也左右手有病治之以良醫省院闕失不以御史臺治之可乎凡諸王百司違法越禮一體舉劾風紀重則貪墨懼猶斧斤重則入木深其勢然也朕有闕失卿亦以聞朕不爾責也乙未命博囉等傳旨宣諭雅克特穆爾博迪蘇和碩哈瑪爾圖巴濟拉等曰世祖章皇帝中書省樞密院御

史臺及百司庶府共治天下大小職掌已有定制世祖命廷臣集律令章程以為萬世法成宗以來列聖相承罔不恪遵成憲朕今居太祖世祖所居之位凡省院臺百司庶政詢謀僉同標譯所奏以告于朕軍務機密樞密院當即以聞毋以夙夜為間而稽留之其他事務果有所言必先中書院臺其下百司及誓御之臣毋得隔越陳請宜宣諭諸司咸俾聞知儻違朕意必罰無赦丁酉以陝西行臺御史大夫特穆爾圖為上都留守辛丑

文宗立都督府于京師遣使來奏又以臺憲官除目來上從之癸卯遣使如京師卜日命中書左丞相特穆爾布哈攝告即位于郊廟社稷遣武寧王齊濟克圖及哈瑪爾圖立文宗為皇太子仍立詹事院罷儲慶司以徹爾特穆圖為中書平章政事奇爾濟蘇為中書右丞齊喇濟爾噶郎並為甘肅行省平章政事呼喇台為江浙行省平章政事諾海為嶺北行省平章政事甲辰敕中書省賜官吏送寶者秩一等從者賚以幣帛乙巳監察

御史言嶺北行省控制一方廣輪萬里實為太祖肇基之地國家根本繫焉方面之寄豈可輕任平章塔奇濟素非勲舊奴事都爾蘇崛起宿衛輒為右丞俄陞平章年已七十昏眊殊甚左丞瑪們本晉邸部民以女妻都爾蘇引為都水遂除左丞郎中羅壘市井小人圖魯庫乃晉邸衛卒不諳政務並宜黜退臺臣以聞帝曰御史言甚善其並黜之又諭臺臣曰御史劾嶺北省臣朕甚嘉之繼今所當言者毋有所憚被劾之人苟營求申訴

朕必罪之或庶非其實毋輒以聞五月丁巳朔次都爾伯珍之地戊午遣西安王阿剌特納實哩還京師封特穆爾為保德郡王賜扈駕宿衛士等幣帛有差己未皇太子遣翰林學士承旨額哩音特穆爾來覲庚申次鄂勒歡摩東辛酉御史大夫博囉中政使尚嘉努並特授開府儀同三司以典四番宿衛癸亥次必齊克圖之地翰林學士承旨鄂爾多自京師來覲命有司新武宗幄殿車輿庚午命雅克特穆爾陞用嶺北行省官吏其餘

官吏賜散官一級選用潛邸舊臣及扈從士受制命者八十有五人六品以下二十有六人壬申次圖都爾哈之地詔封琳沁巴勒為柳城郡王以巴濟拉為陝西行臺御史大夫重嘉努為御史中丞乙亥次圖古勒敕大都省臣鑄皇太子寶時求太子故寶不知所在近侍拜布哈言寶藏于上都行幄遣人至上都索之無所得乃命更鑄之實默哩等四十三驛旱災命中書以糧賑之計八千二百石丁丑皇太子發京師鎮南王特穆爾布哈



諸王伊蘇昂吉達賚布哈多爾濟巴勒巴延額布根駙  
馬巴咱爾及扈衛百官從行戊寅京師市馬二百八十  
匹載乘輿服御送行在所己卯次圖古勒河東加翰林  
學士承旨唐古為太尉趙王滿濟勒噶部落旱民五萬  
五千四百口不能自存敕河東宣慰司賑之庚辰賜諸  
王楊珠濟爾鈔二百錠幣帛二千匹辛巳次鄂羅木圖  
之地壬午次布勒圖之地是日左丞相特穆爾布哈等  
以帝即位攝告南郊甲申次和拉和實衮之地六月丁

亥朔次昆都楞鄂布爾之地是日特穆爾布哈等以帝  
即位攝告于宗廟社稷戊子雅克特穆爾等奏中政院  
越中書省擅奏除授移文來徵制勅已如所請授之然  
於大體非宜乞禁止庶使政權歸一從之庚寅次薩里  
之地陝西行省告饑遣使還都與諸老臣議賑救之丁  
酉次烏納巴之地陞都督府為大都督府己亥次和塔  
之地樞密院奏皇太子遣使來言近已頒赦四川諸省  
兵遣還營惟雲南逆謀巨測兵未可即罷今臣等以聞

帝曰可仍屯戍俟平定而後罷辛丑次索勒濟爾之地  
壬寅戒近侍毋得輒有奏請甲辰賜駙馬圖卜巴爾鈔  
千錠往雲南丁未次哈拉衮戊申次呼圖克阿喇勒  
辛亥次哈喇哈納圖之地詔諭中書省臣凡國家錢穀  
銓選諸大政事先啟皇太子然後以聞癸丑次呼圖之  
地甲寅賑陝西臨潼華陰二十三驛鈔千八百錠晉寧  
路十五驛鈔八百錠是月特穆爾布哈以久旱啟于皇  
太子辭相位乞更選賢德委以變理皇太子遣使以聞

帝諭竒爾濟蘇等曰修德應天乃君臣當為之事特穆爾布哈所言良是天明可畏朕未嘗斯須忘于懷也皇太子來會當與共圖其可以澤民利物者行之卿等其以朕意諭羣臣七月丙辰朔日有食之甲子次博囉和尼之地壬申監察御史巴勒丹伊實言朝廷自去秋命將出師戡定禍亂其供給軍需賞賚將士所費不可勝紀若以歲入經賦較之其所出已過數倍况今諸王朝會舊制一切供億俱尚未給而陝西等處饑饉荐臻餓

殍枕籍加以冬春之交雪雨愆期麥苗槁死秋田未種  
民庶遑遑流移者衆臣伏思之此正國家節用之時也  
如果有功必當賞賚者宜視其官之崇卑而輕重之不  
惟省費亦可示勸其近侍諸臣奏請恩賜宜悉停罷以  
紓民力臺臣以聞帝嘉納之仍敕中書省以所言示百  
司乙亥次博囉察罕之地丙子文宗受皇太子寶戊寅  
次薩勒扎之地壬午遣使詣京師敕中書平章政事哈  
瑪爾圖同翰林國史院官致祭太祖太宗睿宗三朝御

容發諸衛軍六千完京城八月乙酉朔次翁果察圖之地丙戌皇太子入見是日宴皇太子及諸王大臣于行殿庚寅帝暴崩年三十葬起輦谷從諸陵是月己亥皇太子復即皇帝位十二月乙巳知樞密院事臣額布勒等議請上尊諡曰翼獻景孝皇帝廟號明宗三年三月壬申祔于太廟

元史卷三十一

元史卷三十一考證

天曆二年三月 按三月原刻訛二月今據永樂大典  
改

四月甲午立行樞密院命昭武王赫伯知樞密院事

按君前臣名天澤之義昭郡王原刻未書名今據諸  
王表增

十二月乙巳請上尊諡 按文宗紀作十月丙申與此  
異



